

1068

Na osnovu člana 74. stav (5) Zakona o osnovnom odgoju i obrazovanju – prečišćeni tekst („Službene novine Tuzlanskog kantona“, br. 10/20, 8/21, 11/21, 5/22, 10/22, 11/22, 9/23-presuda US FBiH i 12/23), ministar obrazovanja i nauke Tuzlanskog kantona donosi

P R A V I L N I K**o disciplinskoj odgovornosti učenika u osnovnoj školi****I. OPĆE ODREDBE****Član 1.****(Predmet Pravilnika)**

Ovim pravilnikom utvrđuju se povrede discipline, postupak za utvrđivanje disciplinske odgovornosti učenika, naknada za pričinjenu materijalnu štetu, trajanje izrečene odgojno-disciplinske mjere, ublažavanje i ukidanje, te posljedični odnos na ocjene iz vladanja učenika u osnovnoj školi (u daljem tekstu: škola).

Član 2.**(Rodna neutralnost)**

Izrazi koji se koriste u ovom pravilniku, bez obzira na to jesu li korišteni u muškom ili ženskom rodu, obuhvataju na jednak način i muški i ženski rod.

II. POVREDE DISCIPLINE**Član 3.****(Disciplinska odgovornost)**

(1) Za neredovno pohađanje nastave, nemaran odnos prema radu i učenju, raznim aktivnostima u školi, za nedoličan odnos prema drugim učenicima u školi, nastavnicima, stručnim saradnicima i ostalim zaposlenicima u školi, za nemaran odnos prema školskoj imovini, za nedolično oblačenje, za narušavanje kućnog reda škole, za bilo koji oblik nasilja u školi, te za ponašanje koje narušava ugled škole, učenik odgovara disciplinski.

(2) Učenik je odgovoran za povredu discipline koja je nastala kao posljedica njegove krivice ili nepažnje.

(3) Sumnja u pogledu postojanja činjenica koje čine obilježje povrede discipline, ili utiču na utvrđivanje disciplinske odgovornosti učenika, razmatrat će se na način koji je povoljniji za učenika protiv kojeg se vodi disciplinski postupak.

Član 4.**(Svrha odgojno-disciplinskih mjera)**

Odgojno-disciplinska mjera ima pedagoški, odnosno odgojni karakter i izriče se u slučajevima kada se može očekivati da će se njenim izricanjem ostvariti odgojna svrha.

Član 5.**(Vrste povreda discipline)**

(1) Povrede discipline mogu biti lakše i teže.

(2) Vršnjačko nasilje, ili bilo koja druga vrsta nasilja, smatra se posebnom povredom discipline, koja zahtijeva postupanje sa skraćenim rokovima.

Član 6.**(Lakše povrede discipline)**

Lakše povrede discipline učenika su:

- a) neopravdano izostajanje sa nastave i drugih oblika odgojno-obrazovnog rada do 18 časova u toku školske godine;
- b) ometanje odgojno-obrazovnog rada;
- c) neprimjereno ponašanje prema drugim učenicima, nastavnicima, stručnim saradnicima i drugim zaposlenim u školi;

- d) neprimjereno odijevanje;
- e) nepoštovanje odluka nadležnih organa i tijela škole;
- f) neinformisanje roditelja/staratelja o rezultatima učenja i vladanja;
- g) nenamjerno oštećenje školske imovine;
- h) oštećenje ili uništenje ličnih stvari i pribora učenika i zaposlenika škole;
- i) izbjegavanje učešća u školskim manifestacijama i drugim planiranim aktivnostima škole;
- j) upotreba mobilnog telefona ili drugih elektronskih uređaja u toku nastave bez odobrenja nastavnika;
- k) neumjesno dobacivanje sa seksualnom porukom, psovanje, lascivni komentari, širenje priča, etiketiranje, seksualno nedvosmislena gestikulacija.

Član 7.**(Odgojno-disciplinske mjere za lakše povrede discipline)**

(1) Za lakšu povredu discipline učeniku se mogu izreći sljedeće odgojno-disciplinske mjere:

- a) ukor razrednika, prilikom prvog počinjenja lakše povrede discipline;
- b) ukor razrednog vijeća, za svako naredno počinjenje lakše povrede discipline.

(2) Kod izricanja odgojno-disciplinske mjere iz člana 6. tačka a) obavezna je postupnost u izricanju mjera i to na način da se u situaciji kada učenik ima od 6 do 12 neopravdanih izostanaka izriče odgojno-disciplinska mjera ukor razrednika, a kada učenik ima od 13 do 18 neopravdanih izostanaka izriče odgojno-disciplinska mjera ukor razrednog vijeća.

(3) Odgojno-disciplinsku mjeru ukor razrednika izriče razrednik, a odgojno-disciplinsku mjeru ukor razrednog vijeća izriče razredno vijeće.

(4) Škola je dužna obavijestiti roditelja/staratelja o učinjenoj lakšoj povredi discipline nakon počinjenja iste od strane učenika i uključiti ga u odgojni rad i to prije izricanja odgojno-disciplinske mjere.

(5) O izrečenoj odgojno-disciplinskoj mjeri škola je dužna obavijestiti roditelja/staratelja učenika pismenim putem.

Član 8.**(Teže povrede discipline)**

Teže povrede discipline učenika su:

- a) samovoljno napuštanje časa i/ili podstrekavanje drugih učenika da napuste čas ili onemogućavanje održavanja časa;
- b) učestalo ponavljanje lakših povreda discipline;
- c) falsifikovanje svjedodžbe, učeničke knjižice, pismenih i kontrolnih radova, te uvjerenja i potvrda izdatih od strane škole, te prepravljavanje ocjena u razrednoj knjizi i drugoj evidenciji;
- d) falsifikovanje ljekarskih opravdanja;
- e) fizičko nasilje (guranje, štipanje, grebanje, gađanje, čupanje, ujedanje, saplitanje, šutiranje, prljanje, uništavanje stvari, šamaranje, udaranje, gaženje, cijepanje odjeće, zatvaranje, pljuvanje, otimanje i uništavanje imovine, izmicanje stolice, čupanje za uši i kosu, tuča, davljenje, bacanje, prouzrokovanje povreda, uskraćivanje hrane i sna, izlaganje niskim temperaturama, napad oružjem);
- f) zastrašivanje, ucjenjivanje uz ozbiljnu prijetnju, iznuđivanje novca ili stvari, ograničavanje kretanja, uključivanje u destruktivne grupe i organizacije;
- g) prijetnja, izolacija, maltretiranje, organizovanje grupa i sudjelovanje u istim koje ima za posljedicu povređivanje drugih;
- h) prisvajanje školske imovine i imovine drugih učenika i zaposlenika;
- i) posjedovanje, upotreba alkohola, cigareta i narkotičkih sredstava i psihoaktivnih supstanci u školi ili u školskom dvorištu, kao i podstrekivanje na njihovu upotrebu;
- j) omalovažavanje nastavnika i ostalih zaposlenika škole;

- k) posjedovanje oružja i drugih opasnih predmeta;
- l) izražavanje nacionalne, vjerske, rasne i neke druge netrpeljivosti;
- m) neopravdano izostajanje sa nastave i drugih oblika odgojnog-obrazovnog rada 19 i više časova u toku školske godine;
- n) zloupotreba mobilnog telefona i drugih elektronskih uređaja u toku nastavnog procesa;
- o) zloupotreba elektronskih uređaja izvan nastavnog procesa (snimanje nasilnih scena, distribuiranje snimaka i slika sa nasilnim sadržajima, pornografija, dijeljenje različitih sadržaja na socijalnim mrežama sa namjerom izrugivanja drugog učenika i zaposlenika škole);
- p) namjerno oštećenje ili uništenje školske imovine,
- r) lažne dojave o podmetnutim eksplozivnim sredstvima u prostoru škole;
- s) intimno i seksualno uznemiravanje učenika (seksualno dodirivanje, pokazivanje pornografskog materijala, pokazivanje intimnih dijelova tijela, svlačenje, podvođenje, navođenje, iznuđivanje, prinuda na seksualni čin, silovanje, incest);
- t) neprimjereno ponašanje usmjereno na nastavnika (fizički napad, zloupotreba informacionih tehnologija i sl.).

Član 9.

(Odgojno-disciplinske mjere za teže povrede discipline)

(1) Za težu povredu discipline učeniku se izriču sljedeće odgojno-disciplinske mjere:

- a) ukor direktora, za teže povrede discipline iz člana 8. tačke a), b), j) i n);
- b) ukor nastavničkog vijeća i premještaj u drugo odjeljenje, za teže povrede discipline iz člana 8. tačke d), f), g), h), l) i p);
- c) premještaj u drugu najbližu školu na području istog grada/općine, odnosno susjednog grada/općine ako na području tog grada/općine egzistira samo jedna škola, za teže povrede discipline iz člana 8. tačke c), e), i), k), m), o), r), s) i t).

(2) Kod izricanja odgojno-disciplinske mjere za težu povredu discipline iz člana 8. tačka m) obavezna je postupnost u izricanju mjera i to kako slijedi:

- a) od 19 do 25 neopravdanih izostanaka izriče se odgojno-disciplinska mjera ukor direktora;
- b) od 26 do 30 neopravdanih izostanaka izriče se odgojno-disciplinska mjera ukor nastavničkog vijeća i premještaj u drugo odjeljenje;
- c) 31 i više neopravdanih izostanaka izriče se odgojno-disciplinska mjera premještaj u drugu najbližu školu na području istog grada/općine.

(3) Odgojno-disciplinsku mjeru ukor direktora izriče direktor, o čemu donosi rješenje.

(4) Odgojno-disciplinske mjere ukor nastavničkog vijeća i premještaj u drugo odjeljenje te premještaj u drugu najbližu školu na području istog grada/općine, izriče nastavničko vijeće, o čemu škola donosi rješenje koje potpisuje u ime nastavničkog vijeća direktor škole.

(5) Neposredno nakon započinjanja disciplinskog postupka škola je dužna obavijestiti roditelja/staratelja učenika o počinjenoj povredi discipline.

(6) Premještaj u drugu najbližu školu na području istog grada/općine, odnosno susjednog grada ili općine ako na području tog grada/općine egzistira samo jedna škola, podrazumijeva drugu najbližu školu u odnosu na mjesto boravišta učenika.

(7) Preporuku o izboru škole u koju se učenik premješta daje gradski/općinski aktiv direktora vodeći računa o broju učenika i ostalim relevantnim faktorima u školi u koju se učenik premješta.

(8) Nakon izricanja odgojno-disciplinske mjere, iz stava (1) tačka c) ovog člana, škola koja je izrekla mjeru dužna je školi u

koju je učenik premješten dostaviti svu potrebnu dokumentaciju, kao i informacije o preduzetim pedagoškim mjerama.

(9) Škola u koju je učenik premješten kao rezultat odgojno-disciplinske mjere obavezna je prihvatiti učenika.

(10) Učenik kojem je izrečena odgojno-disciplinska mjera premještaj u drugu najbližu školu na području iste općine dužan je početi pohađati školu odmah po konačnosti odluke o izricanju odgojno-disciplinske mjere.

(11) U slučaju da učenik ne počne pohađati školu u koju je premješten, škola je dužna o nastalim okolnostima obavijestiti nadležni centar za socijalni rad.

(12) Odgojno-disciplinska mjera premještaj u drugu najbližu školu učeniku se može izreći samo jednom u toku školske godine.

(13) Učenik kojem je izrečena odgojno-disciplinska mjera premještaj u drugu najbližu školu sa sobom prenosi sve rezultate u učenju i vladanju koje je postigao u matičnoj školi.

(14) Odgojno-disciplinska mjera premještaj u drugu najbližu školu ne može se izreći učeniku ukoliko je ostalo manje od mjesec dana do završetka nastavne godine.

III. POSTUPAK ZA UTVRĐIVANJE ODGOVORNOSTI UČENIKA

Član 10.

(Postupak za utvrđivanje teže povrede discipline)

(1) Za teže povrede discipline učenika škola je dužna voditi postupak za utvrđivanje odgovornosti, o čemu mora biti obaviješten roditelj/staratelj učenika.

(2) U postupku utvrđivanja odgovornosti učenika (u daljem tekstu: postupak), pored uzimanja izjava od učenika, moraju se uzeti izjave svjedoka čije svjedočenje može biti od važnosti za vođenje postupka.

(3) Izjava od učenika i svjedoka, ukoliko su isti maloljetni, obavezno se uzima u prisustvu roditelja/staratelja.

(4) Postupak za težu povredu discipline se pokreće na prijedlog razrednika, najkasnije u roku od tri radna dana od učinjene teže povrede discipline, a postupak se okončava donošenjem rješenja.

(5) Ukoliko razrednik ne pokrene postupak, prijedlog za pokretanje postupka može podnijeti predmetni nastavnik, razredno vijeće ili nastavničko vijeće.

(6) Postupak vodi disciplinska komisija, koju formira direktor škole, koja broji tri člana iz reda nastavnika i stručnih saradnika i u čijem je sastavu i razrednik učenika.

(7) Sekretar škole je sekretar disciplinske komisije iz stava (6) ovog člana, i stara se o zakonitom provođenju postupka.

(8) Disciplinska komisija je dužna utvrditi sve činjenice na datu okolnostu, upoznati se sa svim navodima u prijedlogu za pokretanje postupka, kao i omogućiti učeniku da se, uz prisustvo roditelja/staratelja, izjasni o navodima koji ga terete za učinjenu povredu.

(9) Disciplinska komisija pismenim putem obavještava roditelja/staratelja učenika o danu uzimanja izjava od učenika, najkasnije tri dana prije dana određenog za uzimanje izjava.

(10) Učenik koji je počinio povredu discipline o učinjenoj povredi daje izjavu u prisustvu roditelja/staratelja.

(11) Ukoliko nije moguće obezbijediti prisustvo roditelja/staratelja uzimanju izjave od učenika, škola o nastalim okolnostima obavještava nadležni centar za socijalni rad i inspekciju za obrazovanje.

(12) Zapisnik o davanju izjave učenika potpisuju svi članovi disciplinske komisije koja vodi postupak.

(13) Ukoliko je disciplinska komisija, na osnovu činjenica, utvrdila da je počinjena povreda discipline iz člana 8. ovog pravilnika, ista će nadležnom organu predložiti izricanje

odgovarajuće odgojno-disciplinske mjere.

(14) Prilikom izricanja odgojno-disciplinske mjere uzimaju se u obzir: težina učinjene povrede i njene posljedice, stepen odgovornosti učenika, okolnosti pod kojima je povreda učinjena, ranije ponašanje učenika, ponašanje poslije učinjene povrede, uzrast učenika i druge olakšavajuće i otežavajuće okolnosti.

(15) Izrečena odgojno-disciplinska mjera treba osigurati ostvarivanje odgojnog cilja kao i da odgojno utiče na učenika kako bi svoje ponašanje uskladio sa normama ponašanja utvrđenim općim aktima škole.

(16) Odluka nastavničkog vijeća o odgojno-disciplinskoj mjeri donosi se većinom glasova ukupnog broja članova prisutnih na sjednici.

(17) Ukoliko se postupak vodi za povrede discipline iz člana 8. tačka e), i to: tuča, davljenje, bacanje, prouzrokovanje povreda, uskraćivanje hrane i sna, izlaganje niskim temperaturama, napad oružjem, davljenje i tačaka f), g), i), k), r), s) i t), škola donosi odluku o privremenom udaljenju učenika iz škole, do okončanja postupka, u kojoj se utvrđuje način izvođenja nastave za učenika u periodu dok je udaljen iz škole, kao i sve druge obaveze koje škola i učenik treba da obavljaju za vrijeme privremenog udaljenja iz škole.

Član 11.

(Rješavanje po žalbi)

(1) Na izrečenu odgojno-disciplinsku mjeru za težu povredu discipline roditelj/staratelj učenika može podnijeti žalbu školskom odboru.

(2) Na izrečenu odgojno-disciplinsku mjeru iz člana 9. stavovi (3) i (4) ovog pravilnika žalba se podnosi školskom odboru u roku od osam dana od dana prijema Rješenja o izrečenoj odgojno-disciplinskoj mjeri, osim u slučajevima kada se postupak za utvrđivanje odgovornosti provodi u skladu sa članom 13. ovog pravilnika, u kojem slučaju se žalba na izrečenu odgojno-disciplinsku mjeru podnosi školskom odboru u roku od tri dana od dana prijema rješenja o izrečenoj odgojno-disciplinskoj mjeri.

(3) Žalba na odluku o izrečenoj odgojno-disciplinskoj mjeri odlaze izvršenje odluke do donošenja drugostepene odluke.

(4) Izuzetno, učenik kojem je izrečena odgojno-disciplinska mjera premještaj u drugu najbližu školu na području istog grada/općine, može biti premješten u drugu školu i prije donošenja drugostepene odluke ako negativno utiče na ostale učenike i ometa odgojno-obrazovni rad u školi.

(5) Prije donošenja odluke po žalbi, školski odbor je dužan pribaviti izjašnjenje disciplinske komisije koja je vodila prvostepeni postupak.

Član 12.

(Rok za donošenja rješenja po žalbi)

(1) Školski odbor je dužan odlučiti po žalbi u roku od 15 dana od dana prijema žalbe, osim u slučajevima kada se postupak za utvrđivanje odgovornosti provodi u skladu sa članom 13. ovog pravilnika u kojem slučaju je školski odbor dužan odlučiti po žalbi u roku od 5 dana od dana prijema žalbe.

(2) Odluka školskog odbora je konačna.

Član 13.

(Disciplinski postupak u slučajevima nasilja)

(1) U slučajevima nasilja, koji su propisani odredbama Pravilnika o kućnom redu u osnovnoj školi („Službene novine Tuzlanskog kantona“, broj: 16/23), (u daljem tekstu: Pravilnik), počinjen od strane učenika, postupak se vodi ubrzano u skladu sa ovim pravilnikom.

(2) Prijedlog za pokretanje postupka se podnosi odmah, bez odlaganja, a može ga podnijeti razrednik, predmetni nastavnik,

dežurni nastavnik, stručni saradnik, direktor škole, razredno vijeće ili nastavničko vijeće.

(3) Postupak vodi disciplinska komisija, koju formira direktor škole odmah po prijemu prijedloga za pokretanje postupka, i koja radi na način propisan članom 10. ovog pravilnika.

(4) Na osnovu utvrđenih činjenica disciplinska komisija nadležnom organu predlaže izricanje odgovarajuće odgojno-disciplinske mjere u roku od tri radna dana od dana imenovanja.

(5) Na osnovu prijedloga disciplinske komisije nadležni organ izriče odgojno-disciplinsku mjeru odmah po prijemu prijedloga.

Član 14.

(Čuvanje dokumentacije i evidencije)

Dokumentacija i evidencija propisana ovim pravilnikom čuva se pet godina.

IV. DUŽINA TRAJANJA, UBLAŽAVANJE I UKIDANJE ODGOJNO-DISCIPLINSKE MJERE

Član 15.

(Dužina trajanja odgojno-disciplinskih mjera)

(1) Odgojno-disciplinska mjera za lakšu povredu discipline izriče se učeniku bez vođenja postupka i važi za školsku godinu u kojoj je izrečena.

(2) Odgojno-disciplinske mjere za težu povredu discipline izriču se u skladu sa postupkom propisanim ovim pravilnikom i važe za školsku godinu u kojoj su izrečene.

Član 16.

(Ublažavanje ili ukidanje izrečene odgojno-disciplinske mjere)

(1) Odluku o ublažavanju, odnosno ukidanju odgojno-disciplinske mjere donosi organ koji je tu odgojno-disciplinsku mjeru izrekao, na prijedlog razrednika za lakše povrede discipline, ukoliko je odgojno-disciplinsku mjeru donijelo razredno vijeće, odnosno nastavničkog vijeća za teže povrede discipline, a nakon pozitivne evaluacije provedenog dodatnog ili intenzivnog odgojnog postupka koji se provodi u skladu sa odredbama Pravilnika.

(2) Organ nadležan za ublažavanje, odnosno ukidanje odgojno-disciplinske mjere, dužan je odluku o prijedlogu za ublažavanje, odnosno ukidanje odgojno-disciplinske mjere, donijeti u roku od 15 dana od dana podnošenja prijedloga iz stava (1) ovog člana, izuzev ukoliko se radi o ukidanju odgojno-disciplinske mjere ukor razrednika, o čijem ukidanju razrednik odlučuje bez prijedloga za ukidanje iste ukoliko se steknu uslovi za njeno ukidanje.

(3) Odluka o ublažavanju, odnosno, ukidanju odgojno-disciplinske mjere, iz člana 7. stav (3) ovog pravilnika, učeniku se saopćava usmeno i pismeno obavještava roditelj/staratelj učenika.

(4) O ublažavanju, odnosno, ukidanju odgojno-disciplinske mjere iz člana 9. stavovi (3) i (4) ovog pravilnika donosi se rješenje i dostavlja roditelju/staratelju učenika.

(5) Protiv rješenja iz stava (4) ovog člana može se izjaviti žalba u roku od osam dana od dana prijema rješenja školskom odboru škole

(6) Odluka po žalbi je konačna.

V. POSLJEDICE IZRICANJA ODGOJNO-DISCIPLINSKE MJERE NA VLADANJE UČENIKA I PRIMJENA ODGOJNO-DISCIPLINSKIH MJERA

Član 17.

(Snižavanje ocjene iz vladanja kao posljedica izrečene odgojno-disciplinske mjere)

(1) Izrečena odgojno-disciplinska mjera povlači snižavanje ocjene iz vladanja učenika, i to:

- ukor razrednika - ocjena "vrlo dobro",
- ukor razrednog vijeća - ocjena "dobro",
- ukor direktora - ocjena "zadovoljava",
- ukor nastavnčkog vijeća i premještaj u odjeljenje ili drugu najbližu školu - ocjena "loše".

(2) Smanjenje ocjene iz vladanja vrši se poslije konačnosti izrečene odgojno-disciplinske mjere.

Član 18.

(Primjena odgojno-disciplinskih mjera)

(1) Odgojno-disciplinske mjere mogu se izreći svim učenicima škole od prvog do devetog razreda za povrede discipline učinjene u školi ili van škole tokom realizovanja nastavnih i vannastavnih aktivnosti (izleti, ekskurzije, posjete i slično).

(2) Odgojno-disciplinske mjere izriču se i učenicima sa poteškoćama ukoliko učine povredu discipline, s tim što se u disciplinskom postupku obavezno uzima u obzir medicinska dokumentacija učenika, kao i mišljenje stručnog saradnika odgovarajućeg profila.

VI. MATERIJALNA ODGOVORNOST

Član 19.

(Provođenje postupka i utvrđivanje odgovornosti za pričinjenu materijalnu štetu)

(1) Roditelj/staratelj učenika odgovara za materijalnu štetu koju učenik učini u školi namjerno krajnjom nepažnjom, u skladu sa zakonom.

(2) Za štetu koju je prouzrokovalo više učenika, odgovornost je solidarna ukoliko nije moguće utvrditi stepen odgovornosti za štetu svakog učenika.

(3) Za utvrđivanje materijalne štete vrijednosti do 100,00 KM (stotinu konvertibilnih maraka) nadležan je razrednik, a za utvrđivanje štete vrijednosti preko 100,00 KM (stotinu konvertibilnih maraka) nadležna je tročlana komisija koju formira direktor škole.

(4) Razrednik je član komisije iz stava (3) ovog člana.

(5) Direktor, na osnovu prijedloga razrednika, odnosno komisije, donosi rješenje o materijalnoj odgovornosti, visini štete i roku za naknadu štete.

(6) Direktor može donijeti odluku o oslobađanju roditelja/staratelja učenika od materijalne odgovornosti za štetu, zbog teške materijalne situacije u porodici.

(7) Na rješenje direktora o materijalnoj odgovornosti, roditelj/staratelj učenika može izjaviti žalbu školskom odboru, u roku od 15 dana od dana prijema rješenja.

(8) Školski odbor donosi odluku u roku od 15 dana od dana prijema žalbe.

(9) Odluka školskog odbora je konačna.

(10) Ako roditelj/staratelj učenika ne nadoknadi štetu utvrđenu rješenjem, škola je dužna pokrenuti postupak protiv roditelja/staratelja za naknadu štete pred nadležnim sudom u skladu sa zakonom.

Član 20.

(Utvrđivanje visine materijalne štete)

Visina materijalne štete utvrđuje se prema tržišnim cijenama oštećene ili uništene stvari.

VII. ZAVRŠNE ODREDBE

Član 21.

(Prestanak važenja ranijeg propisa)

Stupanjem na snagu ovog pravilnika prestaje da važi Pravilnik o povredama discipline, postupku za utvrđivanje disciplinske odgovornosti učenika, naknadi pričinjene materijalne štete, trajanju izrečene odgojno-disciplinske mjere, ublažavanju i ukidanju, te posljedičnom odnosu na ocjene iz vladanja učenika u osnovnoj školi („Službene novine Tuzlanskog kantona“, broj: 2/17).

Član 22.

(Okončanje započetih postupaka)

Postupci utvrđivanja disciplinske odgovornosti učenika započeti u skladu sa ranijim propisima bit će okončani u skladu sa ovim pravilnikom.

Član 23.

(Stupanje na snagu pravilnika)

Ovaj pravilnik stupa na snagu narednog dana od dana objavljivanja u „Službenim novinama Tuzlanskog kantona“.

Bosna i Hercegovina
-Federacija Bosne i Hercegovine-
TUZLANSKI KANTON
Ministarstvo obrazovanja i nauke

MINISTAR

dr. sci. Ahmed Omerović,v.r.

Broj: 10/1-34-19878-4/23
Tuzla, 24.10.2023. godine

1069

Na osnovu člana 48. stav (1) Zakona o osnovnom odgoju i obrazovanju („Službene novine Tuzlanskog kantona“, br. 10/20, 8/21, 11/21, 22/21, 5/22, 10/22, 11/22, 9/23-presuda US FBiH i 12/23), članova 13. i 20. Zakona o izdavačkoj djelatnosti („Službene novine Tuzlanskog kantona“, broj: 3/02), u predmetu rješavanja zahtjeva Izdavačke kuće „Buybook“ d.o.o. Sarajevo broj: 26/09-2023-011 od 26.9.2023. godine za odobrenje i korištenje radne sveske Challenges 2 u sedmom razredu osnovne škole za nastavni predmet Engleski jezik, Ministarstvo obrazovanja i nauke Tuzlanskog kantona donosi

RJEŠENJE

I.

Odobrava se upotreba i korištenje radne sveske „Challenges 2 Workbook“, autorice Liz Kilbey za nastavni predmet Engleski jezik (prvi strani jezik) u sedmom razredu osnovne škole u školama na području Tuzlanskog kantona.

II.

Rješenje stupa na snagu danom donošenja i objavit će se u „Službenim novinama Tuzlanskog kantona“.

Bosna i Hercegovina
-Federacija Bosne i Hercegovine-
TUZLANSKI KANTON
Ministarstvo obrazovanja i nauke

MINISTAR

dr. sci. Ahmed Omerović,v.r.

Broj: 10/1-34-024222-1
Tuzla, 12.10.2023. godine